

**Inuussutissarsiutigalugu aalisarnikkut angallateeqqanik kvoteqartussanik
minnerpaaffiliinissami takissuseq 9 meter aallaavigalugu pitsaaqutinik ajoqutinillu
nassuiaateqaqqullugit ukiuni 12 ikaarsaariarfeqartillugit Naalakkersuisut
nalunaarusioqqullugit peqquneqarnissaanik Inatsisartut aalajangiiffigisassaattut
siunnersuut**

pillugu

Aalisarnermut, Piniarnermut Nunalerinermullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Henrik Fleischer, Siumut, siulittaasoq
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia
Inatsisartunut ilaasortaq Erik Jensen, Siumut
Inatsisartunut ilaasortaq Laura Taunajik Uisatikitseq, Siumut
Inatsisartunut ilaasortaq Steen Lynge, Demokraatit
Inatsisartunut ilaasortaq Múte Bourup Egede, Inuit Ataqtigiit
Inatsisartunut ilaasortaq Hans Enoksen, Partii Naleraq

Ulloq 13. november 2019-imi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Naalakkersuisut nassuiaasiornissamik siunnersuutikkut peqquneqassapput.
Inuussutissarsiutigalugu aalisarnermi umiatsiaaqqat pisassiissutitallit minnerpaamik 9
meterimik takissuseqalersinneqarnissaasa pitsaaqutai ajoqutaalu nassuiaatip imarissavai.
Ukiunik 12-inik sivisussusilimmik ikaarsaariarfeqarnissaq nassuiaammi aallaavigineqassaaq.

Siunnersuutip Inatsisartunit siullermeerneqarnera

Siunnersuut akuersaarneqarluarpoq. Ilaatigut oqaatigineqarpoq immami isumannaatsuunissamut siunnersuut peqataaqataassasoq. Oqaluuserinninnermi piffissaq ikaarsaariarfiusussaq ukiunit 12-init sivikinnerussasoq siunnersuutigineqarpoq oqallisigineqarlunilu.

Ataatsimiititaliap siunnersuummik suliarinninnera

Siunnersuut ataatsimiititaliamit suliarineqarpoq. Siunnersuut ataatsimiititaliap soqutigintippaa isumaqarlunilu aalisarnermut ataatsimoortumik politikeqarnerup ilaatut isigineqassasoq. Inuussutissarsiutigalugu aalisarnermi umiatsiaaqqat pisassiissutitalinnut piumasaqaatinik allanngortitsinerup pitsaaqutitai ajoqutaalu nassuiaatikkut siunnersuutigineqartukkut paasinarsisinneqassapput.

Nassuiaatip piaarnerpaamik suliarineqarnissaa ataatsimiititaliami amerlanerussutillit Siumumeersut Demokratineersullu naleqquttut pingaaruteqartutullu isigineqarpoq, taamaaliornikkut nassuiaammi inerniliussat Aalisaneq pillugu Isumalioqatigiissitap sulineranut ilanngunneqarnissaat angumerineqarsinnaaqqullugu. Taamaattumillu nassuiaatip UKA2020 sioqqullugu saqqummiunneqarnissaanik imaqartumik ataatsimiititaliami amerlanerussutillit Siumumeersut Demokratineersullu allannguutissatut siunnersuummik saqqummiussivoq.

Siunnersuummi qitiutinneqartoq tassaavoq immami isumannaatsuunissap annertusarneqarnissaa, tassa umiatsiaaqqat 9 meterit taakkunanngalu takinerusut inuussutissarsiutigalugu atorneqartussat imarsiornermut aqutsisoqarfiup isumannaatsuunissamut piumasaqaataanut malinnittussaammata.

Umiatsiaaqqat inuussutissarsiutit pisassiissutitalit takissusissaannik minnerpaaffissaliisoqassappat pisassiissutinik aalajangersaasarnermut tunngatillugu pitsaaqutit ajoqutillu nassuiaammi paasinarsisinneqarnissaat ataatsimiititaliamit pingaartinneqarpoq.

Piffissap ikaarsaariarfiusussap ukiunik aqqaneq marlunnik sivilissuseqarnissaa nassuiaammi aallaavigineqassasoq ataatsimiititaliamit maluginiarneqarpoq. Tamanna ataatsimiititaliap paasinninnera malillugu inuussutissarsiutigalugulu umiatsiaaqqanut nutaanut Namminersorlutik Oqartussat tapiissuteqartarnerat pillugu inatsit atuuttoq aallaavigalugu piffissap ikaarsaariarfiusussap ukiunik aqqaneq marlunnik sivilissuseqarnissaa siunnersuutigineqarsimavoq.

Inuussutissarsiutigalugu umiatsiaaqqanut nutaanut tapiissuteqartarnek aalisarnermik piniarnermillu inuussutissarsiutillit inuussutissarsiorerannik siuarsaneq pillugu Inatsisartut

inatsisissaanni nr. 13, 3. december 2012-imeersumi maleruagassiuunneqarpoq. Tassani allassimavoq ukiut aqqaneq marlukkaartumik umiatsiaaqqamut nutaamut tapiissuteqarnissaq qinnutigineqarsinnaasoq aammalu tapiissutit ukiut aqqaneq marluk ingerlanneranni nalikillilerneqarsinnaasut. 2020-mi aningaasanut inatsimmi konto pingaarnermi 51.07.40-mi umiatsiaaqqanut tapiissutissatut 2.881.000 kr.-it immikkoortinneqarsimapput.

Piffissap ikaarsaariarfiusup ukiunut tallimanut sivikillineqarsinnaanera ataatsimiititaliamit oqaluuserineqarsimavoq, taamatullu periarfissaliinerup kingunerisassaasa nassuiaammi allaaserineqarnissaat Naalakkersuisunut kaammattuutigineqarpoq.

Makku pillugit apeqqutit Naalakkersuisut nassuiaammi ilanngutissagaat siuliani allassimasut tunngavigalugit ataatsimiititaliamit kaammattuutigineqarpoq:

- Minnerpaaffiliinerup 9 meterinut allanngortinneqarnerata umiatsiaararsorluni aalisartunut aningaasatigut kingunerisassai
- Allanguut imaani isumannaallisaanermut qanoq sunniuteqartussatut naatsorsuutigineqarnerasoq
- Piffissap ikaarsaariarfiusup ukiunik aqqaneq marlunnik sivilussuseqarnissaa imaluunniit sivikinnerulluni assersuutigalugu ukiunik tallimanik sivilussuseqarsinnaanera qanoq sunniuteqassanersoq,
- Umiatsiaaqqat pisassiissutitallit minnerpaamik 9 meteriunissaannik piumasaqaat atuutsinneqalissappat tamanna pisassiissutinik akuersissutinillu tunniussisarnermut qanoq sunniuteqarsinnaanersoq.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

Tamanna naapertorlugu siunnersuutip piviusunngortinnerani aningaasatigut kingunerisassat siunnersuummi nalunaarneqartut ataatsimiititaliamit maluginiarneqarpoq. Nassuiaat AC-fuldmægtigip ukiup affaani 250.000 kr.-inik naleqartumik sulineranik naleqartussatut tagginneqarpoq. Ataatsimiititaliaq tamatumunnga oqaaseqaatissaqanngilaq.

Ataatsimiititaliap inassuteqaatai

Siunnersuut ataatsimiititaliamit amerlanerussuteqartunit Siumumiit Demokratiinillu tapersersornartinneqarpoq.

Kiisalu makku Naalackersuisunit nassuiaammut ilanngunneqarnissaat ataatsimiititaliami amerlanerussuteqartuniit Siumumiit Demokratiniillu kaammattuutigineqarpoq: imaani isumannaatsuunissamut naleqquttutut isigalugu umiatsiaaqqat AIS-imik atortulinnik VHF-eqarnissaannik GPS-eqarnissaannillu piumasaqaateqartoqassappat tamanna aalisartunut ataasiakkaanut qanoq kinguneqassanersoq.

Aalisarneq pillugu Isumasioqatigiisitap sulineranut atatillugu suliap nukinginnarnera tunngavigalugu ataatsimiititaliami amerlanerussutillit Siumumeersut Demokratineersullu **allannguutissatut siunnersuummik** imaattumik saqqummiussivoq, tassani nassuiaatip piffissaq naammassereerfissaa ilanngunneqarluni:

Inuussutissarsiutigalugu aalisarnikkut angallateeqqanik kvoteqartussanik minnerpaaffiliinissami takissuseq 9 meter aallaavigalugu pitsaaqutinik ajoqutinillu nassuiaateqaqqullugit ukiuni 12 ikaarsaariarfeqartillugit Naalackersuisut nalunaarusioqqullugit peqquneqarnissaanik Inatsisartut aalajangiiffigisassaattut siunnersuut. Nassuiaat UKA2020-mi saqqummiunneqassaaq.

Ataatsimiititaliami ikinnerussuteqarluni Parti Naleraq innersuussivoq allannguutissatut siunnersuut assigalugu siunnersuut itigartitsissutigineqassasoq.

Ataatsimiititaliami ikinnerussuteqarluni Inuit Ataqtigiit innersuussivoq allannguutissatut siunnersuut assigalugu siunnersuut itigartitsissutigineqassasoq malitsigisaanillu ima oqaaseqaateqarluni:

Matumani oqaluserisami 6 meter-imiit 9 meter-inut umiatsiaararsortunut killiliussap allanngortinnissaa Inuit Ataqtigiit aporfissaqartinnngilarput. Akuerisinnaanaguli qaleralinniarnermi ukiumoortumik pisassiissutit ukiuni aggersuni appartikkiartuaarneqarnissaat Naalackersuisuniit siunniunneqartoq paasinarsereermat. Piujuartitsinissamik isuma tunuliaqutserparput, akerleraarpullu 6 meter-imiit 9 meterimut killiliussap allanngortinnerani pisassat, tassa, TAC annikillippat aalisartut ilungersonartumi inissisimasut pisassaataannik aalisartut ingerlalluartut pissarsisussaammata.

Tamatuma kingunerissavaa aalisartut inuussutissarsiutiminnit aniatinneqarnissaat. Meterinik qaffaasoqarneratigut sunniutissat pitsaasut pitsaanngitsullu ilisimaneqareerput. Misilittagaqarfigineqareerput, allatut oqaatigalugu, misissugassartaqanngilaq aalisarnermik inuussutissarsiummi inatsisitigut allannguisarnerit ilisimaneqareersut, kingunissaasalu pitsaanngitsut aqqusaarneqareernikut misissuiffigeqqinniarneqarnerat akerleraarput.

Inuit Ataqtigiit manna pisortatigoortumik akerlaraarput, suliassap aallartinneqartussap kingunisi aalisartukillisaanissamik ammaassisussat tunuliaqutsersinnaannginnatsigit. Oqaatigilarput isaasalerlugu “kusanartumik alisartukillisaanissaq” pisortatigoortumik aallartinneqalersoq ilisimariikkatsinnillu misissuisuusaarnertut oqaatigisariaqartumik sulisoqalersoq akuerinngilarput.

Aalisarneq pillugu Inatsisartut inatsisissaat manna Naalackersuisutigoortumik ingerlanneqarpoq, ilaatigut aalisarneq pillugu ataatsimiititaliarsuaq peqatigalugu suliaqartoqarluni. Taakku suliaasa avataatigut Inatsisartut Aalisarnermut Piniarnermut Nunalerinermullu ataatsimiititaliaanni amerlanerussuteqartut aningaasarpassuit atorlugit misissuititsiniarnerat ilalersorsinnaanngilarput.


Aningaasat nunatsinni nualluussuup Coronap akiorniarnernut atorluarsinnaasavut, nunatsinnilu sulisartorpasuit soraarsinneqartussat suliinnarsinnaaqullugit aningaasaliinissamut ilapittuutigisinnaasavut “misissuisuusaarnermut” atorneqarnissaat peqataaffigisinnaanngilarput. Suliffissameermnerup qaffalernerani aalisartukillisaanissamut piareersaatit siunertallu tamaasa, malugalugu, aalisartut piniartullu peqatigiiffii kattuffiilu peqatiginagit ingerlanneqarnissaat Inuit Ataqtigiit isumaqataaffigisinnaanngilaat.

Aalisagartassat sulluunniit annertussutsimikkut ukiumoortumik aalajangersarneqartartut nunatsinni inuiaqatigiinnilu iluaqutaalluartumik atugassaqarfiunissaat kissaatigaarput. Akerlaraarput inuit ikittuinnaat aalisagatassanik pigisassanik niuerutigineqarsinnaasunillu piginnittuullutik eqiterukkiartuinnarnissaannik siunertat qanillattorneqarnissat. Ajornartorsiutit uiorpannioqallisaasut utqqinneqarnissaat piumanagu matumuuna Inuit Ataqtigiit nangaarianngivilluta akerliunerput oqaaseqarfigarput. Aalisagaqassutsip piujuartitsinerullu Naalackersuinikkut pitsaasumik suliarineqarlunilu timitaliiffigineqarnissaa innersuussutigalugit, aalisartullu atukkamikkut pisinnaatitaaffimmikkullu illersorneqarnissaat pillugit ikinnerussuteqarluta oqaaseqaat una taamak Inuit Ataqtigiinnit oqaaseqatigarput.


Allannguutissatut siunnersuutip aningaasaqarnikkut allaffissornikkullu kingunerisassai:

Allannguutissatut siunnersuutaaqqaartumut sanilliulluni aningaasartuuteqarnerunermik nassataqassanngitsoq ataatsimiititaliamit naatsorsuutigineqarpoq. Tassa nassuiaat AC-fuldmægtigip 250.000 kr.-inik naleqartumik ukiup affaanik sulinera naammassineqarsinnaassalluni.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.




Henrik Fleischer
Siulittaasoq



Aqqaluaq B. Egede
Siulittaasup tullia



Erik Jensen




Steen Lynge

Laura Taunajik Uisatikitseq



Múte B. Egede



Hans Enoksen

15.05.2020

UKA 2019/28


UPA 2020/28

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Henrik Fleischer
Siulittaasq

Aqqaluaq B. Egede
Siulittaasup tullia

Erik Jensen



Laura Taunajik Uisatikitseq

Steen Lynge

Múte B. Egede

Hans Enoksen

UKA 2019/28

UPA 2020/28

J.nr.: 01.36.01.03-00095

J.nr.: 01.25.01/2019EM-LABU-00028